



NOGOMETNI SAVEZ FEDERACIJE BiH

Broj: 198/25

Datum: 18.02.2025.

Na osnovu člana 36., a u vezi sa članom 69. i članom 46. stavom 2. Statuta Nogometnog saveza Federacije Bosne i Hercegovine (u daljem tekstu: NS FBiH), Komitet za hitnost NS FBiH na sjednici održanoj 18.02.2025. godine donosi sljedeću:

ODLUKU

o imenovanju Komisije za normalizaciju funkcioniranja
Fudbalskog saveza Kantona Sarajevo

Član 1.

U skladu sa odredbama Statuta NS FBiH (član 46. stav 3.) imenuje se Komisija za normalizaciju funkcioniranja Fudbalskog saveza Kantona Sarajevo u sljedećem sastavu:

1. Prof. dr. Enes Hašić (predsjednik)
2. Predsjednik NS Federacije BiH (član),
3. Predstavnik FK „Sarajevo“ Sarajevo (član) i
4. Predstavnik FK „Željezničar“ Sarajevo (član).

Član 2.

Komisija iz člana 1. ove odluke zadužuje se da:

1. Provede izborni postupak na nivou Fudbalskog saveza Kantona Sarajevo, postupajući po navodima iz Rješenja Ministarstva pravde i uprave Kantona Sarajevo, broj: 03-03-04- 19528/24 od 10.02.2025. godine.
2. Izvrši usaglašavanje Statuta Fudbalskog saveza Kantona Sarajevo sa relevantnim zakonskim propisima važećim na teritoriji Kantona Sarajevo i Statutom NS FBiH,
3. Koordinira i upravlja aktivnostima u vezi sazivanja redovne Skupštine Fudbalskog saveza Kantona Sarajevo od strane Izvršnog odbora Fudbalskog saveza Kantona Sarajevo, sa ciljem usvajanja novog Statuta Fudbalskog saveza Kantona Sarajevo.

Član 3.

FK „Sarajevo“ i FK „Željezničar“ iz Sarajeva se obavezuju da u roku 48 sati po donošenju ove odluke dostave u NS FBiH prijedloge predstavnika ovih klubova u Komisiju iz člana 1. ove Odluke. Krajnji rok za okončanje svih aktivnosti u vezi sa provođenjem izbora i usvajanjem Statuta Fudbalskog saveza Kantona Sarajevo je 30.08.2025. godine.

Član 4.

Ova Odluka stupa na snagu i primjenjuje se danom donošenja.

O b r a z l o ž e n j e

Fudbalski savez Kantona Sarajevo (u daljem tekstu: FSKS), je u skladu sa dokumentom "MAPA PUTA" za provođenje izbora na svim nivoima organizovanja u okviru NS/FS BiH u 2024. i 2025. godini bio u obavezi provesti izbore na nivou Fudbalskog saveza Kantona Sarajevo zaključno sa danom 15.12.2024.

godine.

Međutim, zbog unutarnjih problema u vezi sa načinom sazivanja i održavanja izborne Skupštine FSKS su održane dvije vanredne skupštine FSKS na dane 12. i 13.11.2024. godine, a koja vanredna skupština je odbačena od strane Ministarstva pravde i uprave Kantona Sarajevo dana 13.01.2025. godine (Rješenje broj: 03-03-04-17971/24), dana 11.12.2024. godine sa početkom u 18:00 sati. Paralelno su održane dvije izborne skupštine FSKS, i to jedna u prostorijama Nogometnog/Fudbalskog saveza BiH, a druga u prostorijama hotela "Ibis" u Sarajevu.

Na ovim izbornim skupštinama su izabrani kandidati za članove organa i tijela FSKS, NS FBiH i NS/FS BiH. Zahtjevi za upis promjena su predati Ministarstvu pravde i uprave Kantona Sarajevo. Ovo ministarstvo je odbacilo zahtjeve predstavnika i jedne i druge skupštine iz razloga bliže opisanih u Rješenju Ministarstva pravde i uprave Kantona Sarajevo broj: 03-03-04-19528/24 od dana 10.02.2025. godine.

Kako je prema gornjem Rješenju Ministarstva pravde i uprave Kantona Sarajevo Fudbalski savez Kantona Sarajevo ostao bez imenovanih upravljačkih i drugih organa i tijela, te slijedom prednje navedenog postoji opravdana bojazan da FSKS kao jedan od punopravnih članova Nogometnog saveza Federacije BiH i Nogometnog/Fudbalskog saveza BiH ostane bez svojih predstavnika u organima i tijelima Nogometnog saveza Federacije BiH i Nogometnog/Fudbalskog saveza BiH, što bi posljedično dovelo i do ozbiljnih poteškoća u funkcioniranju prednje navedena dva saveza. To bi izazvalo nesagledive posljedice za klubove članove FSKS u okviru NS FBiH. Stoga je NS FBiH nadležan savez, u čijem članstvu je FSKS, a koji je u skladu sa članom 7. Statuta dužan da se bavi svim pitanjima koja se odnose na nogomet na području Federacije Bosne i Hercegovine. NS FBiH je u obavezi da ishodi mehanizam za rješenje nastale situacije unutar FSKS, te je obavezan uspostaviti temelje za zakonito i nesmetano funkcioniranje FSKS.

Kako pitanje reguliranja unutarnjih odnosa unutar saveza članova NS FBiH nije regulirano niti Statutom NS FBiH niti Statutom FSKS, a imajući u vidu da se radi o stanju koje se objektivno može smatrati višom silom jer je izazvano događajima, okolnostima i činjenicama koje su nastale izvan sfere djelovanja FSKS i NS FBiH i neovisno o njihovoj volji. Novonastale okolnosti se objektivno nisu mogli predvidjeti, otkloniti ili izbjeći, čime su ostvarene pretpostavke iz člana 69. Statuta NS FBiH kojom Izvršni odbor ovog Saveza, bliže određeno Komitet za hitnost NS FBiH, postupi u skladu sa pravom i pravdom. Sve aktivnosti se poduzimaju sa ciljem očuvanja jedinstva, integriteta i stabilnosti nogometa na teritoriji Federacije BiH, kao i očuvanja integriteta, ravnopravnosti i jednakosti svih članova NS FBiH.

Budući da svi članovi, u skladu sa članom 9. Statuta NS FBiH, prilikom predaje zahtjeva za prijem u članstvo u ovaj Savez, između ostalog dostavili i izjavu kojom se obavezuju da će uvijek poštivati Statut, propise, direktive i odluke NS FBiH, NS/FS BiH, FIFA-e i UEFA-e, te da će osigurati njihovo poštovanje koji vrijedi za sve njegove članove, to podrazumijeva da ne postoje zapreke da FSKS u konkretnom, a statutima nepredviđenom slučaju, bude eventualno izuzet od primjene odredaba vlastitog Statuta, koji je također ocijenjen kao neusaglašen sa relevantnim zakonskim propisima. Potrebno je ponovo provesti izbore na nivou FSKS posredovanjem Komisije imenovane ovom Odlukom, sa ciljem uspostavljanja zakonitosti i legalnosti rada ovog saveza.

Slijedom svega prednje navedenog, Komitet za hitnost NS FBiH je donio odluku kao u dispozitivu.

Pouka o pravnom lijeku: *Ova odluka je konačna te protiv iste žalba nije dopuštena.*

PREDSJEDNIK

Dragan Soldo

